

MISYON 2020

EN MEYER LAVI POUR TOU SESELWA

En Nouvo Lekip Pour Sesel

Seselwa pe met lespwar dan Ramkalawan & Afif

Dimans pase, lepep Seselwa in montre ki zot pe esper en nouvo lekip dirizan pour nou pei. Levennman motorcade in anvoy sa mesaz kler.

Si en gran lafoul dimoun in sorti pou fer sa letour Mahe avek paviyon LDS, se akoz zot santi ki le moman in arive pou zot met lafreyer dekote e donn zot lankourazman lekip Prezidansyel LDS.

Akoz bann kondisyon ki lapolis i'n propoze, ti napa long diskour. Me Kandida Prezidansyel Wavel Ramkalawan in fer en ladres kourt pou lans sa faz son kanpanyi ki pou termin le 24 Oktob. I kler ki lepep i anvi tann plis.

In met lanfaz lo slogan anba ki kanpanyi pou deroule e sa se: 'Sesel Pour Tou Son Zanfan'.

I en fraz senp ki eksprim lapros LDS pour Gouvernman e Msye Ramkalawan ti eksplike ki sa i vedir ki pei i bezwen donn tou loportinite son sitwayen e an retour tou Seselwa i bezwen angaze dan travay pour son pei.

Sa i eksprim sa determinasyon pou linite nasyonal, pou anmenn tou Seselwa ansanm koman en sel fanmir.

Sa nouvo lekip LDS in pare pou anmenn en nouvo direksyon anba sa prensip. Lepep seselwa in eksprim zot lespwar pou en nouvo komansman.



GRAN REMERSIMAN POUR TOU DAN MOTORCADE *Sa sipor pou nou kanpanny eleksyon i lakle pour laviktwar*

DANNY FAURE I PER LASANBLE

Sanmenm vre rezon akoz in dizourd boner

pa ni en mister ni en gran lakonplisman politik. Prezidan Faure in disourd Lasanble akoz i per.

Sak zour ki LDS i lo latab dan Lasanble Nasyonal, Msye Faure i perdi ankor en pe kredibilite. Sa ki'n arive sa semenn i tipik. Ler manm LDS in

kestyonn Minis Loustau-Lalanne lo size lalis peyman ki'n ganny fer lo bann program lasistans pour biznes ek travayer, i pa'n kapab ni donn lalis ni eksplike akoz.

Rezon pou kestyon LDS i kler. Gouvernman i bezwen montre lekel ki'n ganny sa bann peyman. Bokou lakonpani ek travayer ki ti ekspekte ganny asiste pa'n gannyen. Alor eski i annan ki'n ganny dan zot plas. Eski i annan ki'n ganny doub? Eski larzan in al pou lot keksoz?

Si Minis pa le donn lalis, se akoz i annan keksoz pou kasyet. Se akoz sa ki zot pa kapab siport prezans LDS dan Lasanble an mezir ki eleksyon i aprese. Zot pa pare



pour reponn kestyon.

Dezision Msye Faure i fer ki la i annan zis Prezidan lo lasenn. Si i annan nesese pou pran lalwa Msye Faure i a bezwen fer li pa dekre, koman en diktater. Si i annan kek manboulouk ki leve, pou napa Lasanble pou met lalimyer lo la e permet Seselwa war ki pe pase.

Dan sa desizyon, Msye Faure in met son politik avan pei, menm ki i dir i met Sesel avan tou.

Annou rapel byen. Ler Msye Faure ti ganny demande pou demisyonnen akoz i ti'n vin la san ganny elekte, i ti dir fodre les li fini sa manda. Sa ki bon pou li pa bon pour Lasanble.

En gouvernman LDS pou siport tou MNA dan zot distrik

Bann MNA LDS ti'an kapab fer bokou plis dan zot distrik si zot ti'n ganny sipor pouwar lezkektiv dan sa ki zot ti anvi fer.

Menm bann MNA kote Gouvernman in ganny difikilte ganny kooperasyon par ler. Sa i fer ki bann MNA pa'n nobou akonplir tou sa ki zot ti anvi.

En lezkektiv dirize par LDS pou anmenn plis kooperasyon avek bann MNA ki'n ganny elekte pour ki i annan plis lenformasyon lo sa ki pou ganny fer e ki



En portre MNA LDS dan kouler nasyonal

manjer bann proze pou deroule. Sa i a larg lanmen bann MNA pou zot kapab reponn konsern dimoun dan zot distrik. LDS pou fer la diferans.

Donn nou
en pti
nouvel



KASKADYEN

Alors Msye Danny pe dir in ris karpet anba nou lipye? Mon krwar ya ok! **Problemm se ki pa nou ki'n tonbe me se son tim ki 4 larou anler.** Bann sef US ziskan bann MNA pa konnen kote zot ete e bokou pa konpran kote Danny pe ale. Menm VP i war i pe al dan ranpar avek *all on board*.

Be mon pe get son ranplasan... **wa krwar Loustau pa tro solid lo son lipye.** LDS in anvoy de dife lo li dan lasanble sa semenn e i totalman anpaye, pa konnen kot pou vire. Mon granmanman in toul-tan dir mwan ki ou fasil konnen ler en dimoun i dan lanbara. I pran gran gran fraz pou dir nanryen ditou.

Detay sa bann larzan Covid ki sa msye pa oule donner! Mon pa konnen kisisa k'in pase deryer nou ledò, me mon santi ki i annan keksoz ki pe ganny kasyet. Minister Finans in peye, me zot dir zot napa detay lo sa bann peyman. Sa mon pa kapab konpran akoz si ou napa detay, lo ki baz lenformasyon ki oun partaz larzan lepep Seselwa? Pa pran nou pou tro boufon!

Nou tou nou'n deza war zanfan malelve, be sa Kakayonyont i kas tou rikord. Tipik en dimoun ki bat labous san ki lespri i angaze. Menm son bann dalon i anbarase pour li. Enn ler **mon demande si vremen parti US ti napa lot dimoun pou met dan sa plas.** En zour son lalang pou fer son maler sa boug!

Lo en not pli serye ... ler mon ti pe get sa motorcade Dimans pase, monn finalman konpran degre fistrasyon ki dan leker nou pep. Wa krwar en dimoun in pase e in tir kouvertir lo sa kasrol ki ti pe bwi depi 43 long lannen. Wi, **Msye Ramkalawan i klerman sa dimoun ki pou redonn nou nou laliberte e nou zwa-de-viv.** Nou avek ou Father, liber sa pei e redonn nou bann frer ek ser en vre rezon pou selebre!

Kaskadyen